

შინაური საქმეები

№ 27.

კვირა, ოქტომბერი 18, 1909 წ.

ფასი წლიურად — — 4 მან.

„ ნახევარი წლით — — 2 1/2 მან.

ცალკე ნომერი ღირს 10 კაპეკით.

აღრესი: მუთაისი „შინაური საქმეების“
რედაქცია

ყოველკვირეული გაზეთი.

შინაური: წიგნი წიგნთა; ქართველებისადმი—რამპოლლასი; საფუძვლიანი ხმები დასავლეთ ევროპაში კომუნისტურ სკოლის და სკოლაში სარწმუნოების დასაცვაად; მეცამეტე საუკუნის ხელნაწერ კონდაკების განხილვის შედეგი—რამპოლლასი; ორიოდ სიტყვა ჩვენ გაზოფენაზე—ბოსლევლისა; მარტვილი (ლექსი) რ. საჯავახოვლისა; მაგალითები, რომლებიც ამტკიცებენ სულის უკვდავობას და საიქიო ცხოვრების არსებობას—სანმანანისა; კვირიდამ კვირობამდე.

ყოველკვირეული გაზეთი
„შინაურ საქმეებს“
ხელის მოწერა შეიძლება რედაქციაში, ქ. ქუთაისში (საბურთალო—გაზაყადის შესახვევში № 17) და სავაჭრო სტაქში.
წლიური ფასი 4 მან. ნახ. წლით 2 მ. ღ 50 კ.
გაზეთი ღებულობს დასაბეჭდად ყოველგვარ განცხადებებს.
ღარჩენ. № № ახალი ხელის მომწ. დაით. 1 მ. ღ 50 კ.

წიგნი წიგნთა*.)

(სვეტლოვიდან).

თანამედროვე ფრანკოელი რაციონალიზმის წარმომადგენელი, ცნობილი ისტორიკოსი რელიგიისა ალბერტ რევილი სტატიებში რომელიც მოთავსებულია Revue Les Deut mondes 1864 წ. მოგვიხრობს: „ერთხელ საზოგადოებაში აღიძრა საიქიო შესახებ იმისა, თუ რომელს წიგნს აირჩევდა თვითიული დამსწრეთაგანი, რომ მისთვის მიესაჯათ სიკვდილამდე პატიმრობა და ნება მიეცათ კამერაში მხოლოდ რომელიმე წიგნის შეტანისა. აქ იყვნენ კათოლიკები, პროტესტანტები, ურწმუნო ფილოსოფოსები, მატერიალისტებიც კი; მაგრამ ყველა უწყაზნოდ შეთანხმდა ერთზე, რომ შეიძლება მხოლოდ ბიბლიის არჩევა“.

ერთ ერთ თვალსაჩინო წინამორბედ თანამედროვე ინდივიდუალიზმისა ლიტერატურაში მისი უკიდურესი ათეიზმის ფორმებით, დემონიზმისა ანუ ღვთის წინააღმდეგ ბრძოლისა, უეჭველად უნდა ჩაითვალოს ბაირონი, მაგრამ მას არ შეიძლება ვუწოდოთ ურწმუნო განუსჯელად. ბაირონის თხზულებებმა, რომლებიც სავსე არიან ერთმანეთის მოწინააღმდეგე აზრებით, გამოხატეს მისი ცხოვრება და პირადობა, სავსე წინააღმდეგობით: მოუფიქრებელ აზრებთან სარწმუნოების შესახებ, ხანდახან გმობასთან და ურწმუნობასთან ბაირონში მშვიდობიანად თავსებოდა უწრფელესი სარწმუნოებრივი მხურვალეობა და გვიღობის

*) იხ. „შინ. საქ.“ № 26. საბ. ბაქ. სს. საბ. ბაქ. სს. საბ. ბაქ. სს. საბ. ბაქ. სს.

დაიბეჭდა კლიტვიუს უწყებები

ახალი ფორმისა
თანამედროვე სინოდის ნაჩვენებ ნიმუშისა.
მოიკითხეთ

იმერეთ. წმ. გიორგის სარწმ. განმ. „ძმობის“

სტამბაში

ქ. ქუთაისში, თფილისის ქუჩაზე, ს. კირიშჩევის სახლში (გუბერნატ. კანც. ქვეშ).



საზრისი, რომლებიც გამოიხატენ პოეტურ ფორმით სარწმუნოებრივ მხრით მშვენიერ ლექსებში. ბაირონს უყვარდა ბიბლია და არ იზორებდა მას მოგზაურობის დროს; ის ხშირად იყო ხოლმე მისთვის პოეტურ აღფრთოვანების წყაროდ. პოეტის სიკვდილის შემდეგ ბიბლიაში იპოვეს პატარა ნაკერი ქაღალდისა შემდეგი მისგან დაწერილი წარწერით: „ამ უწმიდესს წიგნში არის საიდუმლო ყველა საიდუმლოთა. ბედნიერნი არიან ისინი, ვისაც ღმერთმა მიმადლა ამ წიგნის სიტყვათა სმენა, წაკითხვა და ლოცვითი ღმობიერებით გამეორება და მოკრძალებით შეთვისება მათი! ბედნიერნი არიან ისინი, ვისაც შეუძლიანთ გაუღონ კარი ღვთის სიტყვას და იარონ მისგან ნაჩვენებ გზით! მაგრამ უკეთესია, რომ არ შობილიყვნენ ის კაცები, რომლებიც კითხულობენ ბიბლიას თვისი ეჭვის და ბიბლიის შეურაცხყოფის განსამტკიცებლად.

როგორც თვისტომი კარლ მარქსისა, სპინოზის და ლასალისა, ჰეინე არ შეიძლება განწყობილი ყოფილიყო ქრისტიანობასთან და ამ უკანასკნელმა ჰპოვა ამ კაცში სასტიკი მტერი. მაგრამ მძიმე ავადმყოფობამ და სხვა გარემოებებმა, მისცეს ჰეინეს მიზეზი ბიბლიაში ეძებნა ნუგეში - და მაში მოხდა ზნეობითი ცვლილება, რომელსაც ჰეინე აწერს ბიბლიას. ამის გამო აი ჰეინე რასა სწერს ბიბლიის შესახებ თავის წიგნის გერმანიის ფილოსოფიის და რელიგიის შესახებ მეორე გამოცემაში: „ჩემი გულის განათლებით მე სრულიად დავაღებული ვარ ერთი წიგნის კითხვისგან. ერთი წიგნისა? დიახ, და ეს არის ძველი, მარტივი წიგნი, მშვიდი, როგორც ბუნება და ბუნებრივი, როგორც ბუნება, წიგნი, რომელიც საქმიანად და მარტივად გამოიქტირება, როგორც მზე, რომელიც ჩვენ გვათბობს, როგორც ჰური, რომელიც ჩვენ გვასაზრდოვებს... ეს წიგნი მოკლედ რომ ვთქვათ არის ბიბლია. სრულიად სამართლიანად უძახიან მას საღვთო წერილად. ვისაც დაუკარგავს ღმერთი თავის სულში ის ხელახლად ჰპოვებს მას ამ წიგნში, ხოლო ვისაც

სრულიად არა სკოდნია იგი, მას მოეფინება ამისგან ფშვინვა საღვთო სიტყვისა“.

რუდოლფ ვაგნერი ერთი შესანიშნავი ანატომთაგანი (1805—1864) თავის წიგნში „დავა სულის შეახებ“, ამბობს: „უეჭველად, ბიბლიის ღირსებაა, რომ ის თვითონ აძლევს შტურყველო-მტკიცე დარწმუნებას თვის საღვთო წარმოდგომაში იმას, ვინც სერიოზულად და გულდადებით უკვირდება მას და თვის ცხოვრებას აწესებს თანახმად ამ წიგნისა“.

ცნობილი ლინგვისტი ვილჰელმ გუმბოლდტი: „ძველი აღთქმის წიგნები, რომლებიც მოაწიეს ჩვენამდის უწინდელი დროიდან, არიან უძვირფასესნი მათზე ისტორიულ მოწმობათა სიხადით და სისრულით... მე ხშირად მასიამოვნებდა ხოლმე ის აზრი, რომ შესაძლებელი ყოფილა შედგენა ესოდენ დიადისა, მდიდრისა და სხვა და სხვაფერისა, როგორც ბიბლია. ეს ერთი წიგნი ხალხისთვის ეწევა ყველა კაცის სულის ნაწარმოების მაგივრობას, ისტორიისას, პოეზიისას, ფილოსოფიისას, ამასთანავე ძნელად თუ არის ისეთი მდგომარეობა კაცის სულისა და გონებისა, რომელიც არ იპოვიდა ბიბლიაში შესაფერ პასუხს. ამასთანავე ბიბლიაში ცოტაა ისეთი რამე, რის გაგებაც არ შეიძლებოდეს უბრალო გრძობით; ბევრის მკოდნენი უფრო ღრმად სჭვრეტენ ბიბლიას, მაგრამ კი არავენ არ რჩება დაკმაყოფილებული. კითხვა ბიბლიისა არის უსაზღვრო და უნამდვილესი წყარო ნუგეშისა. ძნელია ამ შემთხვევაში რაიმეს შედარება ბიბლიასთან. ერთნაირად ძლიერი, თუმცა კი თვისებით სხვა და სხვანაირი, ნუგეში გვეძლევა, როგორც ძველის, ისე ახალი აღთქმის წიგნების კითხვისგან. ორივე აღთქმაში ვხედავთ ერთსა და იმავე ღვთის განგების მოქმედებას, ერთსა და იმავე გაბატონებულს იდეას და ორივე მათგან, შესაფერი სარწმუნოებრივ-ზნეობრივი სულის განწყობილების დროს იზრდება ღრმად—შეურყვევლი დარწმუნება, რომ ცხოვრებაში სამწუხარო შემთხვევებიც კი, ღვთის სიბრძნით, მიმართულია საზოგადო და თვით მისგან და მისთვის ვნებულთა სასიკეთოდ“.

მაშინ, როდესაც ჩვენი თანამემამულე ქირისუფალნი ხალხის განათლებისა სკდლო-ბენ გაუფუქონ ხალხის თვალში სახელი ბიბლიას სხვა და სხვა ქორების გავრცელებით შესახებ „ბიბლიის გამოუსადეგრობისა აღზრდისა და ზნეობისათვის“, დასაველეთს ევროპაში ურწმუნო სწავლულნი ჩვენებურებზე უფრო განათლებულნი სულ სხვა აზრისანი არიან ბიბლიის შესახებ. აი რასა სწერს ცნობილი „ინგლისელი მოციქული დარვინიზმისა“, პროფესორი გექსლი: „ყურადღებით ჩაუკვირდით ფრიად მნიშვნელოვან ისტორიულ ფაქტს, რომ ეს წიგნი (ბიბლია) სამი საუკუნის განმავლობაში შედულდა ინგლისის ისტორიის საუკეთესო და უკეთილშობილეს კაცთა ცხოვრებასთან! განა სხვა რომელი წიგნის საშუალებით აღიზრდებოდნენ ბავშვები კაცურად და გაიმსქვალებოდნენ იმ შთაბეჭდილებით, რომ ყოველივე კაცი მკის იმას, რაც დაუთესია, დამოკიდებით იმაზე, რისადმიც მიიღტვის, და რასაც აკეთებს და რაც უყვარს? მე არ ვამბობ, რომ უმაღლესი იდეალი ბიბლიისა რიკხავდეს სხვა იდეალებს და არ საჭიროებდეს რაიმე დამატებას. მაგრამ მე ვფიქრობ, რომ კაცობრიობას ჯერ არ მიულწევია იმ საფეხურამდე, რომელზედაც მას ბიბლია აღარ ქირდება და რომ ვერც მიალწევს ის ამ საფეხურს“. აი რას ამბობენ ბიბლიაზე თვით ევოლიუციის თვალის საზრისითაც კი! აგრეთვე უფრო მოწყალედ ჩვენებურს სწავლულებზე, რომელნიც იცნობენ ბიბლიას მხოლოდ გაგონილი ხმებით, ლაპარაკობენ ბიბლიის შესახებ თანამედროვე რაციონალიზმის წარმომადგენელნი. ცნობილი ისტორიკოსი რელიგიათა ალბერტ რევილი სწერს: „ბიბლია (მიუხედავად კრიტიკისა) რჩება იმათვე, რათაც იყო, ჩვენ რელიგიურ წარმოდგომის წარუვალ ძეგლად და მოაზრე კეთილმსახურებისა და გონიერი რწმენის საუკეთესო მისაზრდოველ საშუალებად. არაოდეს ბიბლია არა ყოფილა საგნად ასეთი დაწვლილებითი და კადნიერი კრიტიკისა, როგორც ჩვენს დროში და არაოდეს მისი გავლენა და გავრცელება არა ყოფილა ისრე დიდი, ვიდ-

რე ეხლა. ბიბლია გადათარგმნილია ას ოცდათხუთმეტ ენაზე (ეს ნათქვამია 1864 წ.). ეხლაც და უწინაც ის ხანდახან აძლევს ხან ერთს, ხან მეორე ხალხს ანბანს და მითი სწავლობენ წერა-კითხვას“.

ერთმა გამოჩენილმა ოსტრონომთაგანმა იოანე მელდერმა (1794—1874) ახალ ბინაზე გადასვლის დროს პირველად ყოვლისა გადიტანა იქ ბიბლია და ახალს სადგომში შევიდა სიტყვებით: „ყველა წიგნებზე აღრე ჩემს სახლში უნდა შევიდეს ეს წიგნიო“...

ნაპოლეონ პირველი აღტაცებით ლაპარაკობს ბიბლიის შესახებ: „სახარებას აქვს რაღაც ნაირი დაფარული ძალა, რაღაცნაირი სიტობო, რომლებიც მოქმედობენ გონებაზე და სწვდებიან გულს. სახარება წიგნი კი არაა, არამედ არის ცოცხალი, მოქმედი, ძლიერი არსება, რომელიც სძლევს ყოველსავე, რაც კი მოინდომებს მის წინააღმდეგობის გაწევას. აი ისა სდევს აქ სტოლზე, ეს წიგნი ყველა წიგნთაგან (ამ სიტყვებთან იმპერატორი მოკრძალებით ხელით შეეხო წიგნს); მე არ ვიღლები ამის კითხვით და ყოველდღე ვკითხულობ მას ერთ და იმვე სიამოვნებით. სახარების სიმშვენიერით გატაცებული სული აღარ ეკუთნის თავის თავს; მას მთლად იპყრობს ღმერთი. იგი აძლევს მიმართულებას მის აზრებს და სურვილებს, ის ხდება ღვთის საკუთრებად“.

დიდი სახელმწიფო კაცი და ღრმა მოაზრე გლადსტონი შესავალში ბიბლიის სახალხო გამოცემისა ბიბლიის მნიშვნელობაზე ამბობს: „ეს დაუღვენელი საუნჯე გვეუბნება განა, ან გვეტყვის როდისმე უარს ჩვენი სურვილების დაკმაყოფილებაზე, რა გაჭირვებაც უნდა გვეწვიოს ცხოვრებაში? რომელი წოდება და მდგომარეობა არა მდიდრდება მუდამ ეპ და მუდამ ღღე ამ სიტყვებით, რომლებსაც არ ასუსტებს არავითარი გამეორება. რომლებიც ღღეს ისევე, როგორც პირველს ღღეებში, შეიცავენ სიყმაწვილის და უკვდავების სიახლეს? ცალკე მკვლევარმა რომ გაუხსნას მათ თვისი გული, რომ მიიღოს ისინი თავისში, მისი შრომა დაჯილდოებული იქნება.“

განმარტოებულ საპრობილეშიც, წყნარ ლამეშიც, ავადმყოფობაშიც, სიკვდილის პირზეც ყველგან და ყოველთვის ბიბლია ჩვენთან არის, გვანუკეშებს, გვამხნეებს და გვაზაგრებს ჩვენ“.

უდიდესი ფილოსოფოსი კანტი სწერს შტილინგს: „თქვენ კარგს შერებით რომ სახარებაში ეძიებთ ნუგეშს, რადგანაც იგი არის დაუღვენელი წყარო ყველა ქეშმარიტებათა, რომლებიც სხვაგან არსად იპოვებიან, თუ გონებამ წესიერად განსაზღვრა თვისი სამფლობელოს საზღვრები“.

ცნობილი ბუნების მეტყველი და ფილოსოფოსი ფენონი თავის გრძელ მსჯელობას ბიბლიის უცვალეველ მნიშვნელობაზე ათავენს ასრე: „ყველა თხუზულებანი უმშენიერესნი და უგონიერესნი, რომლებსაც ვითომცდა საუკუნო მნიშვნელობა აქვთ, იღუპებიან და ადგილს უთმობენ სხვა წიგნებს. ბიბლია, ძველი ბიბლია, რჩება და არი, და დარჩება, და სული ქრისტესი მაში გაბენილი სიხარულით და სისალით გამსქვალავს ყველა სულიერად ავადმყოფებს და დაღლილებს, რომლებიც კი მოვლენ მასთან“.

ჟან-ჟაკ რუსო თხუზულებაში „ემილი“ სწერს: „გამოვტყდები, რომ საღვთო-წერილის სიღაღე მავსებს მე გაცვიფრებით. სიწმიდე სახარებისა ბევრ რამეს ექადაგება ჩემს გულს. შეხედეთ ფილოსოფოსების წიგნებს ყველა მათი ბრწყინვალეობით და სიდიდით, როგორ მკირენი არიან ისინი ამ წიგნთან შედარებით! შესაძლებელია განა, რომ ესოდენ მაღალი და ესოდენ მარტივი წიგნი იყოს კაცის სიტყვად? შესაძლებელია განა, რომ ის, ვიხედავ ეს წიგნი მოგვიტხრობს იყოს უბრალო კაცი? უფრო ბუნებრივია ვიფიქროთ, რომ ქეშმარიტად არსებობდა ის, ვინც მისცა მასალა ამ წიგნისთვის, ვიდრე მივიღოთ რაოდენიმე პირთა შეთანხმება ამ წიგნის შესაღვანად“.

სწავლული ისტორიკოსი ი. მიულლერი სწერდა თავისს მეგობარს ვბონეტს: „ძველ დროთა შესწავლის დროს, მე ყოველთვის ვგრძნობდი რაღაცა ნაკლს და მხოლოდ მაშინ,

როცა ვსცანი ღმერთი ახალი აღთქმის კარგად შესწავლით, ყოველივე ჩემთვის ცხადი შეიქმნა: მასთან ერთად ჩემთვის აღარათფერი არ არის აუხსნელი“.

ფრანციელი სწავლული ისტორიკოსი გიზო თვისი ანდერძის პირველს ფურცელზე სწერდა: „ვხედავ ღვთის გონებას და მოქმედებას არა მხოლოდ მსოფლიოს მართვა-გამგეობაში და კაცის სულის დაფარულს ცხოვრებაში და კაცთა საზოგადოებათა ყოფნის აღწერაში, ნამეტნავად კი ძველსა და ახალს აღთქმაში. მე ქედს ვიხრი ბიბლიის და სახარების საიდუმლოთა წინაშე“.

ცნობილი მწერალი კრიტიკოსი ბელინსკი ამბობს: „არის წიგნი, რომელშიც ყველაფერია ნათქვამი, ყველაფერია გადაწყვეტილი, რომლის შემდეგაც აღარათფერი არ არი ექვი, წიგნი უკვდავი, წმიდა წიგნი, საუკუნო ცხოვრებისა... მთელი პროგრესი კაცობრიობისა, ყოველი გამარჯვება მეცნიერებაში, ფილოსოფიაში მდგომარეობენ ამ საღვთო წიგნის საიდუმლო სიღრმის უმეტესს გაჭვრეტაში, მის ცხოველ, საუკუნოდ წარუვალ სიტყვათა შეგნებაში“.

მეორე რუსეთის მწერალი, რომელსაც აგრეთვე სთვლიან თავისუფალ მოაზრეთ, სახარების შესახებ ასე სწერს: „სახარება მე ბევრჯელ წამიკითხია და სიყვარულითაც. მე სულ უხელმძღვანელოდ ვკითხულობდი, მაგრამ ყოველივე მესმოდა, მაგრამ ვგრძნობდი ღრმა პატივის ცემას წაკითხულისადმი. სიყმაწვილეში მე ძალიან მივდევი ვოლტერიანობას (თავისუფალ მოაზრებას), მიყვარდა და ცინვა და გაკიღვა, მაგრამ არ მახსოვს, რომ როდისმე ამეღოს ხელში სახარება ცუვი გრძობით; ყველა მასაკში, სხვა და სხვა გარემოებებში მე ვუბრუნდებოდი სახარების კითხვას და ყოველთვის მის შინაარსს ჩამოჰყავდა ჩემ სულში მშვიდობა და სიწყნარე“.

ყველა ზემო თქმულიდან ცხადია აღმატება ბიბლიისა ყველა კაცურ წიგნებზე, მაგრამ რით აიხსნება ეს? განა ბიბლიის შედგენილები თვის სულიერ მნიშვნელობით აღემატებიან კაცობრიობის უდიდესს წარმომად-

გენელებს—პლატონს, სოფოკლს, შექსპირს, გიოტეს და კანტს და სხვათა? მაშ რითი აინას ბიბლიის აღმატება ამ მსოფლიო გენიოსების ნაწარმოებზე? აქ შეიძლება მხოლოდ ერთი სწორე პასუხი, რომელსაც იძლევა ეკლესია, სახელდობრ, რომ ბიბლია არის სიტყვა ღვთისა.

(დასასრული)

ნატარყანელი

ქართველებისადმი.

გარდაიცვლება თუ არა ვინმე მოღვაწე ჩვენს სამშობლოში, ჩვენ ვიწყებთ გოდებას, ვთხზავთ მრავალს ლამაზად მოკაზმულ სიტყვებს, მკვერმეტყველობაშიდ ერთმანეთს ვეჯიბრებით, განსვენებულის ღირსებებს ხშირად ერთიორად-სამად და მეტადაც ვაზვიადებთ, იმის დაკარგვით ჩვენს ქვეყანას ვსთვლით დაობლებულად, დაღუპულად, — და ამით გვინდა გამოვიჩინოთ მამულიშვილობა, სიყვარული სამშობლოსადმი. თვალწინ ვიყენებთ ისტორიას ჩვენის ერისას, განათლებულ ცხოვრებას ჩვენის უუძველესის წინაპრებისას, წარმოვიდგენთ მათ მიერ აღნიშნულ შესანიშნავ ტაძრებსა და ციხეებს, მოვიგონებთ ძველ მწიგნობრობას და ვამაყობთ, გავიძახით: ჩვენც გვქონდა მნიშვნელობა მსოფლიო ცხოვრებაში, — და ამით გვინდა გამოვხატოთ სიყვარული სამშობლოსადმი. თვალწინ ვიხატავთ ჩვენის ქვეყნის სხვა და სხვა ლამაზ კუთხეებს და ვხმობთ: „ბუნებამ თვისი სიმშვენიერე და ძლიერება მარტო ჩვენს ქვეყანაში გამოიჩინა, ასეთი ქვეყანა არსად არ მოიპოვება, — და ამით გვინდა ცხად ვყოთ სიყვარული საქართველოსადმი.

ვხედავთ მრავალს ნაკლულევანებებს ჩვენ აწინდელ ცხოვრებაში და მათ მიზეზებს ჩვენში კი არ ვვძებთ, არამედ სხვებში და ვიწყებთ დრტვინვასა და

შფოთვას, — და ამით გვინდა დავამტკიცოთ სიყვარული მამულისადმი.

ასე ვიქცევით, სამშობლოსადმი სიყვარულს ზემოაღნიშნულ სახეებითა ვხატავთ, მაგრამ ჩვენის წამოყენებას, გაღონიერებას ვერა ვხედავთ. ვლაპარაკობთ, ვკვერმეტყველობთ, და წინმსვლელობა კი არ გვეტყობა: უმეტესი ნაწილი ჩვენი ერისა — გლეხობა სრულიად უმეცარ-შეუგნებელია, სცხოვრობს მოუწყობლად, უღაზათოდ, უსუფთაოდ; თითქოს იმათსა და პირუტყვებს შუადიდი გარჩევა არ არის. ვგრეთ წოდებულ ინტელიგენტთა ცხოვრებაშიაც ვერა ვხედავთ ნიშნებს ნამდვილ განათლებისას, კულტურისას; არ არის მათში მთლიანობა-სოლიდარობა, ერთობრივი მოქმედება, მტკიცე, შეურყეველი მოღვაწეობა; ვერ ნახავთ, რომ რომელიმე საზოგადო დაწესებულება წესიერად და ნაყოფიერად მოქმედებს.

დიდებულნი ნაშთნი მთებზედ, ტყეებსა და მინდვრებშიდ საწყლად გამოიყურებიან, იქცევიან; ძვირფასი ხატები და ხელთ-ნაწერები იკარგება და სხვა.

ეს ასეც იქნება, სანამ ჩვენ ჩვენს მამულიშვილობას მხოლოდ ლაპარაკით გამოვხატავთ, სანამ სამშობლოსადმი სიყვარულს არ გამოვიჩენთ საკუთარ ნივთიერ საშვალების მოხმარებითა საქვეყნო საქმეებზე. წარმატებისთვის საქიროა ნივთიერი საშვალება, ფული და ფული, და ამიტომ ყველა შეგნებული საზოგადო საქმეების გასაკეთებლად უნდა გადასდებდეს ფულს შეძლებისა გვარად, რამდენი ქართველია, რომელსაც წლიური შემოსავალი სამას თუმნამდე აქვს და განა მას არ შეუძლია სამშობლოსათვის ყოველ წელიწადს ათი თუმანი გადასდოს? რამდენი ქართველია, რომლის წლიური შემოსავალი ორას თუმნამდეა, და განა მისთვის სამძიმო იქნება ხუთი თუმნის გამოღება? ასე რომ იყოს, რამდენი ფული მოგროვდებოდა, და რა

არ გაკეთდებოდა! განა ფული არა გვაქვს? გვაქვს, მაგრამ მისი კეთილად მოხმარება არ გვინდა. ჩვენი შეძლება სეირნობასა, პრანქვა-გრეხიაობაში, და მრავალეამიერში მიდის. სამშობლოსთვის მხოლოდ ენას არ ვზოგავთ, ვლაპარაკობთ და ვლაპარაკობთ. რისთვის არ ვბაძავთ სომხებს ცოტათი მაინც? ძმანო, მამულიწვილობა ფულის გამოღებით გამოვიჩინოთ, და არა მხოლოდ მჭევრმეტყველობით.

რამპოლა.

საზოგადოებრივი ხმები დასავლეთ ევროპაში კონფესიური სკოლის და სკოლაში სარწმუნოების დასაცვლად.

(რუსულიდან) *)

რას ამბობენ გამოჩენილი სახელმწიფო კაცები, პედაგოგები, სწავლულები, პოეტები, მწერლები და სხვანი სარწმუნოებისა და კონფესიური (სარწმუნოებრივი) სკოლის შესახებ.

V.

რა უნდა ითქვას ურწმუნო სკოლათა მომხრეების ფრაზების შესახებ.

„თავისუფალი“ სკოლა არის განგებ გამოგონილი იარაღი სარწმუნოებრივ პრინციპებთან საბრძოლველად! ხალხი რომ თავის წინააღმდეგ არ ააღლეოს, მას არა აქვს წოდება უღვთოსი, უსარწმუნოების, მაგრამ შეიცავს კი მთელ მათ საწამლავს და სცდილობს ჩუმად ამოაქნოს სარწმუნოება ბავშვების გულეში და მიიყვანოს ისინი სიკვდილამდე, ისევე როგორც აქნობენ ხოლმე ყვავილებს, როცა მათ აცლიან მასაზრდოებელ სინესტეს.

ბონომელი.

„თავისუფალი“ სკოლის დამცველნი ამბობენ: „რასაკვირველია, ოჯახს აქვს უფლება აღზარდოს შვილები თავის სარწმუნოებაზე, მაგრამ სკოლა ღია უნდა იყოს ყველასათვის განურჩევლად, უნდა პატივს სცემდეს

იხ. „შინ. საქმ.“ № 26.

ყველა აღსარებათა თავისუფლებას, ამიტომ უნდა იყოს უთუოდ ნეიტრალი, ე. ი. არ უნდა მიაქციოს ყურადღება სარწმუნოებრივ უთანხმოებებს და ასწავლოს მხოლოდ ზნეობა, რომელიც გამომდინარეობს ყოველი სარწმუნოებისგანო. სვინიდისის თავისუფლების პატივისცემა გვაიძულებს ჩვენ დავიცვათ „თავისუფალი“ სკოლაო.

პირველად ყოვლისა, ჩვენ სოფლების და ქალაქების სკოლებში მოსწავლე ბავშვებთან გან, რავდენია ებრაელების, პროტესტანტების და თავისუფლად მოაზრეთა შვილები. ბევრს სკოლებში, ნამეტნავად კი სოფლები-საში, ასეთები სულ არ არიან, ხოლო ზოგიერთ ქალაქებში და სოფლებში კი ძალიან მცირენი არიან. და განა უმცირესობას უნდა ანაცვალონ უმრავლესობის ინტერესები? განა ჩვენ იმ ქვეყანაში არა ვცხოვრობთ, საცა ყველაფერი, დაწყებული სულ მცირე საზოგადოებიდან, ვიდრე საკანონმდებლო დაწესებულებამდე, სწყდება უმრავლესობის ხმით? რისგან არის, რომ უმრავლესობას ყველგან პატივი უნდა ეცეს და სკოლაში კი არა? ერთის სარწმუნოების პატივის ცემისთვის, რათ უნდა უგულვებელ ყოფილ იქმნენ სხვანი ათნი? სურთ საერთო, ანუ ნეიტრალი სკოლა ყველა სარწმუნოების პატივისცემისთვის, მაგრამ ეს მეტოდი შემეცდარია, რადგანაც სრული უყურადღებოთ დატოვება, — რომ შეიძლებოდეს კიდევ ამისი განხორციელება — იქნებოდა ყველა მათი შეურაცხყოფა. სარწმუნოება რომ ისეთი რამე იყოს, რის თავიდან აცილება ძალმომრეობით შეიძლებოდეს, მაშინ ამ პრინციპის გამართლება შესაძლებელია, მაგრამ ის პირდაპირ ეხება ყველაფერს, ნამეტნავად კი ზნეობას და ყოველთვის აცილება მისი იქ, საცა ბავშვების აზრით, უნდა იყოს მაზედ ლაპარაკი. ნიშნავს მისს დიდს შეურაცხყოფას. ვითომდა ყველა სარწმუნოების პატივისცემლად, მათ ყველას სდენიან სკოლებიდან და სურთ მათ მაგივრად შემოიღონ თავისი, რომელიც მდგომარეობს ყველა სარწმუნოების უარყოფაში.

სარწმუნოებაო, ამბობენ მოციქულები

და დამცველები თავისუფალი სკოლისა, არის საქმე პირადი, სვინიდისისა, ოჯახისა, ამიტომ მაზე უნდა იზრუნოს თვითეულმა თავისებურად, მაზედ უნდა იზრუნოს თვითეულმა ოჯახმა. პირველად ყოვლისა, არ შეიძლება დავთანხმდეთ, რომ სარწმუნოება არის საქმე მხოლოდ პირადი, საქმე სვინიდისისა, ოჯახისა. სარწმუნოება არის მოვლენა საზოგადო და სოციალური. ამ ცხადი ქეშმარიტების უარის მყოფელს არ უნდა ესმოდეს სიტყვების მნიშვნელობა, ან უნდა სიცრუეში ამხილოს კაცის გონება და ყოველი უროის ისტორია. ეს ნიშნავს პირად საქმედ გამოცხადებას იმისას, რაც ასულდგმულებს და აცხოვრებს და ამოძრავებს მთელ საზოგადოებას.

იქვე 117—119.

სალი გონების შეურაცხყოფად უნდა ჩიითვალოს, თუ ჩვენ უარყოფთ, რომ პრინციპი: „შვილები ეკუთნიან სამშობლოს, მას შეუძლიან თანახმად თავისი სურვილისა, აღზარდოს ისინი, მიუხედავად იმისა, რა შეხედულებებისა და აზრისანი არიან მშობლები—გამოგონილია წარმართთაგან, ხმარებაში იყო მებუთე საუკუნეში ქრისტეს შობამდე და აღდგენილია საფრანგეთის რევოლიუციის წინამძღოლთაგან. ამ შემთხვევაში, ჩვენ შევეკითხებით ამ ახალ სპარტელებს და დამრღვევლებს მშობლების პირველი და ხელშეუხებელი უფლებისას: ვისგან მიიღეს სიცოცხლე შვილებმა, მშობლებისგან თუ სახელმწიფოსგან? ჯერ პირველად მათ ვინ უფლის, აქმევს, აცქევს და ასაზრდოებს? ჩვენ პატივს ვცემთ სახელმწიფოს უფლებას და გვიყვარს მამული; ეს საზოგადო ვალდებულებაა; მაგრამ სახელმწიფოც და მამულიც უნდა პატივს სცემდნენ ოჯახის და მშობლების უფლებას, უნდა იცოდნენ, რომ მათი დიდება და სიკეთე გამომდინარეობენ მათი სარწმუნოებრივი თაყვანისცემისაგან და რომ მათი შთანთქმის სურვილი იქნებოდა უდიდეს ძალმომრეობად. სახელმწიფო გაჩნდა ოჯახის შემდეგ და მისთვის არის, რომ დაიცვას ოჯახის უფლებანი და

არა მისთვის, რომ წაართვას მას ეს უფლება.

იქვე გვ. 117.

„მაგრამ“, გვეტყვიან თავისუფალი სკოლის ადვოკატები, „თუ მშობლებს სურთ სარწმუნოებრივი სწავლება, მათ თავისი შვილები უნდა გაგზავნონ კერძო სკოლებში, იშოვნონ იმისთანა მასწავლებლები, რომლებიც სხვებთან ერთად, სარწმუნოებასაც ასწავლიან“. მაგრამ, მეტ ნაწილად, მშობლები ხომ ძალიან ღარბები არიან, რომ ამაში ფული აძლიონ. საზოგადოებრივი სკოლა უფასოა, ე. ი. მის ფულს იხდის გადასახადის გამღები წოდება, რომელსაც მეტ ნაწილად ღარიბები ეკუთნიან. თუ მათ აიძულებენ, რომ გაგზავნონ შვილები კერძო სასწავლებელში, ამითი მათ ერთი ორად გადაახდევინებენ ხარჯს; განა ეს სამართლიანია? „მათი ნებაა, გაგზავნონ, თუ არ გაგზავნონ იქ შვილები“. მაგრამ თავისუფლება აღარ ეთქმის, თუ მე ფასით შემიძლიან ვიქონიო სკოლა იქ, საცა უკვე არის უფასო. ხოლო თუ მოქალაქეებს აქვთ შეძლება, რომ გადაიხდონ კერძო სასწავლებლებში ფული, სამართლიანია განა, რომ ამათ ეს ხარჯი დაადონ?

იქვე გვ. 121.

ყოველი მამა, რომელიც ჯერ კიდევ ღირსია ამ სახელისა, სწუხს თავისი შვილების მომავლის შესახებ, რომლებსაც ყოველი ბოროტი დაბრკოლება მოელის მას სურს, რომ შვილებში შთანერგულ იქმნას სარწმუნოება, როგორც ზღუდე და მცველი ყოველ კეთილშობილურ ლტოლვილებათა დაცემის დროს. არაგვარი ცოდნა არ მისკემს ამას, რადგანაც ისტორიაც და სინამდვილაც მოწმობენ, თუ როგორ ეცემიან უმადლეს გონებრივ განათლებიდან უღრპეს ზნეობრივ გარყვნილებამდე.

ტილმან პეში.

(დასასრული).

მეცამეტე საუკუნის ხელნაწერ კონდაკების განხილვის შედეგი.

საქართველოს ეკლესიაში მეცხრე საუკუნის ბოლომდე სრულდებოდა წირვა წმ. იაკობ მოციქულისა. მეთე საუკუნიდან მეთერთმეტემდე სრულდებოდა წირვა, როგორც წმ. იაკობისა, ისე იოანე ოქროპირისა და ვასილი დიდისა. ხოლო 1103 წელს მომხდარმა რუს-ურბნისის კრებამ დაადგინა შესრულება წირვისა მხოლოდ კოსტანტინეპოლელ მღვდელ მთავართა: ვასილისა და იოანესი. მეთვრამეტე საუკუნემდე იოანე ოქროპირის წირვის წესი სხვა და სხვაობდა, ამ საუკუნეში ქართული კონდაკი შესწორებული იქმნა სლავიანურ კონდაკებისამებრ, ამნაირად შესწორებულ კონდაკს ვხმარობთ ჩვენ ახლა. უმრავლესობას ჰგონია, რომ ეს კონდაკი უუძველესია, და იმას ხმარობდნენ უუძველესნი წინაპარნი ჩვენნი. ამ კონდაკში ბევრი შეცდომებია. ეხლახან დაიწყეს ტექსტის შესწორება. ასწორებენ უფრო სლავიანურ კონდაკის მიხედვით. აი აქ გვმართებს ფრთხილად მოქცევა. მართალია, ჩვენ ახლა მეოცე საუკუნეში ვართ და ჩვენ უუძველეს წინაპრებზედ გაცილებით მაღლა უნდა ვიდგეთ ყოველ მხრითა, და ჩვენ მიერ შესწორებული კონდაკი ლოლიკურადაც და სტილი-სტიკურადაც უფრო სწორი უნდა იყოს, გარნა ფაქტები სხვას გვიმტკიცებენ. თურმე, ნუ იტყვი, საღვთისმეტყველო მწიგნობრობის მხრივ უუძველესნი ჩვენნი წინაპარნი გვეჯობიან ჩვენ, სახელდობრ მეთე-მეცამეტე საუკუნეთა. ცოცხა არ იქნება, იმათგან ვისწავლოთ და მათ მიერ ხმარებული კონდაკი აღვადგინოთ. თბილისის საეკლესიო მუზეუმში არის უუძველესი კონდაკები, ტყავზე დაწერილები, მეცამეტე საუკუნისა №№ 922, 23, 194, 21 და 757. ამ კონდაკებსა და ახლანდელ კონდაკს შუა ბევრი განსხვავებაა, და ვინც ჩაკვირდება, პირველთ მოიწონებს. აღენიშნოთ ზოგიერთნი განსხვავებანი.

1) კურთხეულ არს მეუფება მამისა, ძისა და წმიდისა სულისა. ყოველგან ასამაღლებლეთ შინ არის; მამისა, ძისა და წმ. სულისა. №№ 922

და 23 და ზოგან №№ 194 და 21. ასეც უნდა იყოს. ვიტყვი: ერთი ღმერთი არის სამპიროვანი: მამა, ძე და სულიწმიდა, და არა მამა და ძე და წმ. სული. მართალია, ბერძნულში „და“ არის ნახმარი, მაგრამ ღირსება თარგმნისა იმაში მდგომარეობს, რომ სინამდვილით და სავსებით გადმოღებულ იქმნას შინაარსი იმისა, რაიცა ითარგმნება, და თანაც დაცულ იქნას კანონები, ფორმები და საერთოდ თვისებები იმ ენისა, რომელზედაც ითარგმნება.

2) რამეთუ შენი არს სიმტკიცე, შენი არს სუფევა, ძალი და დიდება. № 922. „რამეთუ შენი არს სიმტკიცე“ არის დამოკიდებითი წინადადება, ხოლო „შენი არს სუფევა, ძალი და დიდება“—მთავარი. რადგან შენ, ღმერთო, იპყრობ ყოველივეს, შენ ხარ შემქმნელი და განმტკიცებელ-მამოქმედებელი ყოველივესი, ამიტომ შენ გეკუთვნის მეფობა, ძლიერება და დიდება.

3) რამეთუ სახიერი და კაცთ-მოყვარე ღმერთი ხარ, შენდა დიდებასა აღვაღვინთ... სახიერი და კაცთ მოყვარე ღმერთი ხარ—დამოკიდებითი წინადადებაა, ხოლო „შენდა დიდებასა“—მთავარი.

თუ გვინდა, რომ მღვდლის მიერ წარმოთქმულ სიტყვებში მთლიანი აზრი იქმნეს, მაშინ ასე უნდა ითქვას. ხოლო თუ ასამაღლებლებს დაუკავშირებთ იმ ლოცვებს, რომლებსაც მღვდელი ასამაღლებელთა წინ იღუმალად ჰკითხულობს, და არარად ჩათვლით, რომ ხალხისთვის გასაგონ სიტყვებში აზრი დამთავრებულად გამოხატული არ იქმნება, მაშინ შეიძლება ითქვას ისე როგორც ახლა ვიტყვი, ე. ი. ხმა მაღლად ვსთქვათ მხოლოდ დამოკიდებითი წინადადება, და მთავარი კი ხალხისაგან დავმალოთ, და ვეძიოთ იგი საიდუმლო ლოცვებში. აქ უნდა შევნიშნოთ, რომ ყველა ასამაღლებლებს არ მიუძღვის ლოცვები, მაგ. მწუხრსა და ცისკარში.

4) რამეთუ წმიდა ხარ შენ, ღმერთო ჩვენო, შენდა დიდებასა აღვაღვინთ №№ 922 და 21. „რამეთუ წმიდა ხარ შენ, ღმერთო ჩვენო“—დამოკიდებითი წინადადება; „შენდა

დიდებას აღვაფლენთ—მთავარი. თუ ამ სიტყვებს ერთ დამოკიდებით წინადადებად მივიღებთ და მათ საიდუმლო ლოცვას შევუერთებთ, მაშინ ღმერთს მივაწერთ ისეთ თვისებას, რომელიც მის ღირსებას დაამტკიცებს. როცა ვამბობთ: ღმერთი შეგვეწიოს ჩვენ იმით, რომ მისდამი დიდებას აღვაფლენთ, ამით ჩვენ მას თავმოყვარედ ვრაცხთ. გონიერ კაცსაც კი საწყენად დაურჩება, რომ უთხრან: დაგვეხმარე, რადგან შენ გაქებთო.

5) სულისაცა შენისათანა №№ 757 და 922. ახლა ვიტყვი: და სულისაცა შენისათანა, ამნაირად კავშირს „და“-ს ორჯერ ვიტყვი ერთსა და იმავე სიტყვასთან თავში „და“ და ბოლოში „ცა“, ხოლო ეს ქართულ ენას არ უნდა შეესაბამებოდეს: ვიტყვი: ივანესაც მიეცი, და არა „და ივანესაც მიეცი“.

6) რამეთუ მოწყალე და კაცთმოყვარე ღმერთი ხარ (დამოკიდებითი), შენდა დიდებასა აღვაფლენთ (მთავარი) № 922.

რათა ესენიცა ჩვენთანავე აღიდებდნენ ყოვლად პატიოსანსა და დიდად შენისა სახელსა შენსა. №№ 922, 757, 21 და 23.

ორჯერ „და“ რა საქირთა, იხ. ზემოთ 5).

8) აღუასრულოთ ვედრება ჩვენი უფლისა ღვთისა მიმართ №№ 922 და 757. ახლა ვიტყვი: აღუასრულოთ ვედრება ჩვენი უფლისა. ამ სიტყვებიდან გამოდის, ვითომც ჩვენს ლოცვაში ღმერთი საქიროვდეს, მართლა კი ჩვენ ვსაქიროვებთ ვედრებაში. ძველად წერაში სიტყვების შემოკლებისთვის ხშირად ხმოვან ასოებს: ი, ა და ხვებს სტოვებენ. „აღუასრულოთ“ ა ის მაგივრად სწერდნენ: აღუსრულოთ.

9) ანგელოზი მშვიდობისა და ანა ანგელოზი პირველი ქართულ ხმოვანებას უფრო შეეფერება, ვიდრე მეორე.

10) კარნი, კარნი, სიბრძნით მოხედეთ № 21.

11) ვსდგეთ კეთილად, ვსდგეთ შიშით, მოხედეთ წმ. ამის შესაწირავსა №№ 922 და 21.

12) მაღლი უფლისა იესო ქრისტესი, სიყვარული ღვთისა-მამისა და ზიარება სულისა წმიდისა იყვენ თქვენ ყოველთათანა №№ 21,

757, 922 და 194. ამ ასამაღლებელში მოხსენებულნი არიან ღვთაების სამნივე პირნი: მაღლი... ეკუთვნის მეორე პირსა, ზიარება... —მესამე პირსა, სიყვარული—პირველ პირსა; ხოლო პირველი პირი იწოდება „მამა ღმერთი“ ანუ „ღმერთი მამა“ და არა „ღმერთი და მამა“. ამიტომ „სიყვარული ღვთისა“ უფრო სწორია.

13) სულისაცა შენისათანა № 922.

14) წმიდა არს, წმიდა არს, წმიდა არს უფალი საბოთ, სავე არიან ცანი და ქვეყანა დიდებითა მისითა. №№ 922, 194, 757 და 21. ეს სიტყვები ამოღებულია წმ. ისაიას საწინარსამეტყველოდან. იქ კი სწერია, რომ ანგელოზნი ერთი მეორეს უვალობდნენ: „წმიდა არს“...

15) სუით ამისგან ყოველთა... № 194, ახლა ვამბობთ: სუთ, და ეს კი გაუგებარია, თითქო „გაჩუმდით“. ს. ნიშნავსო. ძველად წერილში ინს ხშირად სტოვებდნენ, სიტყვას „სუით“ სწერდნენ ასე: სუთ, რადგან მაშინ ინი იგულისხმებოდა, და შემდეგ კი ინი დაივიწყეს, და დარჩა მარტო სუთ.

16) უმეტესად ყოვლად წმიდისა... ღვთისმშობელისა—მარადის ქალწულისა მარიამისა. №№ 922, 21 და 23. ესევე კვერქსებშიც. ცნებანი: ღვთისმშობელი და მარადის ქალწული ისე მკიდროდ დაკავშირებულნი არიან ერთი მეორესთან, რომ უმჯობესია მათი დაწერა შეერთებულად, გაერთისტყვიანებულად, ვიდრე კავშირის „და“-ს ჩამატებით. ღვთის მშობელი მარიამი შობის დროსაც იყო ქალწული.

17) და იყვენ წყალობანი... და სულისა შენისათანა № 194.

18) და ღირს მყვენ ჩვენ, მეუფეო, კადნიერებით დაუსჯელად კადრებად და ხადად შენდა ზეცათა ღვთისა მამისა და თქმად... №№ 757, 194 და 21.

ხადად გაუგებარია, ხადად უფრო გასაგებია. ხადა-მოუწოდა, ხადილი მოწოდება. „ხადა“-ს მაგივრად ძველად სწერდნენ შემოკლებით ხადა, ანს იგულისხმებდნენ. შემდეგ საუკუნეებში კი ანი დაივიწყეს და დაიწყეს კითხვა ხადად. რამოლოა.

ორიოდე სიტყვა ჩვენ გამოფენაზე.

თავშივე უნდა აღვიაროთ, რომ დიდი მადლობის ღირსნი არიან ბ. ნ. მკურნალი, და სხვა მოღვაწეები, რომელთაც ხელი შეუწყვეს სამეურნეო გამოფენის გამართვას ქუთაისში. ამბობენ გამოფენა სრული არ იყო და რაც იყო, ისიც სასაცილო და უვარგისი ექსპონატების მხრით—და ამას დანაშაულობად ურაცხვენ გამოფენის მოთავეებს, მაშინ, როდესაც ეს სწორეთ ასე უნდა ყოფილიყო. „კოკისა შიგან, რაცა სდგის, იგივე წარმოსდინდებისა“, — სიტყვა უკვდავმა შოთამ. საიდგან შეიძლება სამეურნეო გამოფენის სისრულე, როდესაც ჩვენი მეურნეობა სრული არ არის. ჩვენ მეურნეობას დღეს იგივე უვიცი ხალხი აწარმოებს, რაც მეფე ვახტანგ გორგასლანის დროს და რათ გვიკვირს, რომ მათგან გამოფენილ ექსპონატებში განმეორდა იგივე სოფლის ნაწარმოები. განათლებულ პირებს, ვისაც შეუძლია რამე ცვლილება შეიტანოს ჩვენ პირველყოფილ მეურნეობაში, ჯაკვით ვერ შეათრევ სოფელში და მით უფრო გუთანს ვერ მოაკიდებებ ხელს. მათ ჩინოვნიკის სახელის მოხვეჭა ურჩევნიათ ყოველსა მოსახვეჭელსა* და სანამ ასეთი მიმართულება ჩვენი ნასწავლი საზოგადოებისა არ შეიცვლება, სანამ სასოფლო მეურნეობა საპატიო ხელობად არ გადიქცევა მათთვის, მანამ მას (მეურნეობას) ფერი არ ეცვლება და გამოფენაც ვერაფერს გვიჩვენებს მის მეტს, რაც არ იყო იმავე ვახტანგ—გორგასლანის დროს. ამიტომ გამოფენამ გვიჩვენა სწორედ ის, რაც უნდა ეჩვენებია, გვიჩვენა ჩვენი უვიცობა, ჩვენი უგულობა, ჩვენი სილატაკე და სიკოტრე ყოველი მხრით, არა თუ ორიგინალური ვერაფერი გამოფენით (რაც არ გვქონდა, რას გამოფენდით) სხვისაგან ნასესხებ გადმონადებისაგანაც ისეთი რამეები გამოვიტანეთ საჩვენებლად, რაც პირდაპირ ამცირებს განათლებულ ხალხების კულტურასაც, როგორც მაგ. ედამსობის გუთნები, ფოთის მწვინიანი თაფლის სანთელი, გადაგვარებული ცხველები. გამოფენას ეტყობოდა, რომ ჩვენ-

ში არის სურვილი კულტურულ ქვეყნების მეურნეობის გადმოტანისა, მაგრამ არ არის, ხელმძღვანელი, არ გვყავან შეგნებული მეურნეები.

ისევ საცოდავ სოფლის მასწავლებლებს თუ შეაქვთ ხალხში რაღაც კულტურასავით მეურნეობის მხრით, თორემ სხვა მშველელი კაცი არ ჰყავს სოფელს...

მხარის ბუნებრივ სიმდიდრეთა მაჩვენებელ ექსპონატთა შორის შესანიშნავი იყო გამოფენაზე რაქის პაკილიონი. აქ იყო გამოფენილი სხვა და სხვა მადნეულები და მადნეული წყლები, რომლებიც იპოებიან რაქის მთებში. სასაცილოა, რომ სამწუხარო არ იყოს, რომ ასეთ ბუნებისგან დაჯილდოებულ მხარეს ასეთი ღარიბი ხალხი ასხია. რცხვენოდეს ჩვენ ვაებატონებს, რომლებიც რაღაც ოცნებას ემსახურებიან და ნამდვილ სამოღვაწეო ასპარეზს მხარს უქცევენ!...

არ შეგვიძლია ჩუმით ჩაეუაროთ გელათის მონასტრის სანთლის ქარხნის პაკილიონს. ხელოვნება, რომელიც ამ მონასტრის ძველს შეუსწავლიათ სანთლის კეთების შესახებ, შესაფერია იმ წმიდა საქმისა, რომელსაც ემსახურება თვით მათი ნაწარმოები. უმაღლესი სისუფთავე ნაწარმოებისა, მისი შნო და ლაზათი ერთბაშით იზიდავს ადამიანს და ეუბნება მის გულს, რომ ასეთი ნაწარმოები შესაფერია მხოლოდ ღვთის სახლისა და მისი დიდებისა. სჩანს არც ისე უსარგებლონი იქნებიან ბერები, როგორც ამას ამტკიცებენ ჩვენი მონასტრების მტრები. საკიროა მხოლოდ თანაგრძნობა და მათი მორწმუნე სული არ დაიყოვნებს ნაყოფის გამოღებას.

კიდევ მადლობა განსაკუთრებით ბ. ნ. მკურნალს, რომელმაც თვალთ დაგვანახვა ჩვენი ჩამოკვეითება. იქნებ ამის შემდეგ მიიწი გამოვიღვძოთ და მოვიხმართო ჩვენი ქვეყნის ბუნებრივი სიმდიდრე, რომ ტანტალივით არ ვიტანჯებოდეთ შიმშილ-წყურვილით, როცა ბუნებით მდიდარი ვართ...

ხელი.

ხმაზი ვა. კირიონის განთავისუფლების შესახებ.

როგორც გადმოგვცემენ, ყ-დ სამღვდლო კირიონი სრულიად გაუმართლებია უწ. სინოდს იმ ბრალდებისაგან, რომელსაც სწამებდნენ მას შესახებ განსვენებულ ექსარხოსის მკვლელობის. ამბობენ, სინოდი მეტაჲ გაუარისხებია უსინიდილო დამმეზღებლების უმართებულო საქციელს. მოხარული უნდა ვიყოთ, რომ უწ. სინოდმა გამოიჩინა ამ საქმეში ასეთი მიუდგომლობა და კანონიერება. კანონიერებავე მოითხოვს, რომ სამშობლოს დაუბრუნდეს თვისი სასარგებლო შვილი. ასეთივე ბედი უნდა ეწიოს ჩვენი აზრით მეორე პყრობილს მ. არქიმანდრიტ ამბროსისაც, რომელსაც ამ ბოლო ხანებში სინოდმა წირვა-ლოცვის შესრულების უფლება დაუბრუნა, რაც აშკარად მოწმობს მის უბრალოებას იმ ბოროტ მოქმედებებში, რომელსაც მას სწამებდნენ. ურიგო არ იქნება, ამის შემდეგ მაინც ამოვიღებდეთ ხმას და მოვითხოვდეთ ჩვენ დაქვეითებულ სამღვდლოების მოწინავე წევრების უკანვე დაბრუნებას სამშობლო ეკლესიის სასარგებლოდ და სანუგეშოდ.

ამბობენ, კირიონს ექსარხოსად ასახელებნო. ამ ხმის სარწმუნოდ მიღება ბავშური გულუბრყვილობა იქნება, მაგრამ უწ. სინოდი არ შეცდება, თუ ვინმე ქართველს დანიშნავს ამ თანამდებობაზე. თუ სხვა სარგებლობას ვერაფერს მოიტანს ქართველი ექსარხოსი დღევანდელ პირობებში, იმას მაინც შეიძლება, რომ წირვა და ქადაგება გააგონოს სამწყსოს თვისი ენაზე. გვითქვამს და ვამბობთ, რომ თუ ქართლ-კახეთის სამღვდლოებაც და სამწყსოც დაეცა ზნეობის და სარწმუნოების მხრით, ამის ბრალი უმთავრესად რუს ეგზარხოსებს ედება, რომლებიც მხოლოდ კანცელარიის ჩინოვნიკები იყვნენ და კონტორის კედლებს არ გაშორებია მათი მწყემსთ მთავრული მოღვაწეობა. სარწმუნოება, რომელიც ასე დაცემულია ხსენებულ ეპარქიაში, ცირკულიარებით არ აღდგინდება, არამედ კოცხალ ურთიერთობით. მწყემსსა და სამწყსოს შორის, რაც შე-

საძლებელია მხოლოდ ქართველ ეგზარხოსის, გინა ეპისკოპოსის მხრივ. ვისურვებთ, რომ ხმები გამართლებულიყოს და ქართლ-კახეთის ეპარქიას ღირსებოდეს თავის ენაზე თვისივე მღვდელ-მთავრის სწავლა მოძღვრების მოსმენა. მაგრამ, უეჭველია, მარტო სურვილი, და ისიც ჩვენი, ვერაფერს გააკეთებს, საქიროა ამის შესახებ ხმა აღიმალლოს პრესამ და სხვაგანა და უპირველეს ყოვლისა სამღვდლოებამ, რომლის პირდაპირ მოვალეობას შეადგენს ხალხში სარწმუნოების განმტკიცება. ეხლა სწორედ დროა ასეთი ხმის ამაღლებისა. ბ. დურნოვოს და სხვა ქეშმარიტების მომხრე პირების წერილებიდან სასულიერო მთავრობა გაცნობილია ეგზარხოსების მართვა გამგეობასთან საქართველოში; ის აშკარად ხედავს, რა შედეგი მოიტანა ეგზარხოსობის მართვა-გამგეობამ საქართველოში სარწმუნოების მხრივ და სხვა მხრივაც.

თუ ჯერჯერობით შეუძლებელია საქართველოს ეკლესიის ავტოკეფალობა, სანამ ამისი ქეშმარიტი საფუძვლები არ გამოიკვლევა მაღალ სფერებში, ქართველ ეგზარხოს მაინც რაღა უშლის, მის შემდეგ, რაც გვიჩვენა მწარე წარსულმა!..

ბიასლეველი.

მ ა რ ტ ვ ი ლ ი.

ქონდიდელი,
როდინდელი?
— არონისებრ
ძველი მღვდელი.
ხალხური.

ნამდვილ ეს არის იგი ედემი,
იგი წალკოტი, ბალი—სამოთხე,
სადაც სცხოვრებდა ევა—ადამი,
სადაც ქვეყანას აქვს დასაბამი.
ამ არემარის მშვენიერებით
აქ, სული ტკბება და გული ხარობს,
ნაზი ბუნება თვის ძლიერებით
გრძნობას იზიდავს, რომ შეიყვაროს.
ერთ მხრით აბაშა, წინ ცხენის წყალი,
„ვეფხრატ—ტიგრის“ წილ გარშემოუელის,

ბუნებას თვისი ძლიერი ძალი
 აქ მიუპყრია შემკობად ყოვლის.
 „გეონ“, „ფისონიკ“ ეს უნდა იყოს;
 „ნოლა“, „ინჩხია“-ს წყლები ანკარა,
 სამოთხე უნდა აქ ყოფილიყოს,
 შესადარებლად თურომ ეს კმარა.

გონებავ დასტკბი, გულო ილხინე
 ამ თვალწარმტაცი სანახავითა,
 თვალეზო ხარბათ მიმოილხინეთ,
 გრძნობავ გამეფდი აღმაფრენითა...

ამ არემარის მშვენიერება
 მარტო ახლო არ იპყრობს ჩვენს გულსა,
 იყო დრო როცა ბედნიერება
 კოლხიდელეზსაც უტკობდა სულსა.

თავისთავისა ბედისა ჩარხი
 ხელში ეჭირათ, თვით აბრუნებდენ,
 ბედნიერთათა სცხოვრობდა ხალხი
 და თვისსა სახელს განადიდებდენ.

აქ იდგა დიდი, უზარმაზარი
 ტოტებ გაშლილი, ცად მწდომი „ქყონი“*),
 ქურუმთ მთავრები გასაოცარი
 და ხალხი სჯულით არ მოსაწონი.

ამ ქყონსა დიდსა, კოლხიდის ერი,
 ძველთა ძველწესით მსხვერპლსა სწირავდა,
 და ეს კერპული რწმენა ძლიერი,
 საშვილიშვილო ეგონათ წმინდა.

მაგრამ ანდრია მოციქულმა, რა
 მათ ქრისტეს მცნება მოასმენინა,
 კერპები იქეთ მიყარ-მოყარა
 და ეს ქყონი კი მოაქრევინა.

მის მონაქერზე წმიდა ტაძარი,
 საქრისტიანო, მყისვე ამართა
 და მყისვე ქრისტეს სჯულის სადარი
 ღვთის მსახურება აქ გაიმართა.

ასე, ძველ დროში ესე ადგილი
 იყო სამსხვერპლო, საღვთო საგანი,
 და ახალ დროშიც გახდა მარტვილი
 საქრისტიანო, სჯულის აკვანი.

ამავე დროიდან, აქ იჯდა მარად
 სჯულის მოთავე და გამგებელი,—
 დადიანთ გვარის: ერთი ძმა მთავრად
 და მეორე ძმა, თვით ქყონდელი.

*) ქყონი,—მეგრულათ მუხას ქვია.

რ. ს.

დრონი იცვალენ, განქრა მთავრები,
 გაჰქრა ქყონდიდელთ დიდება ძველი,
 და შეგერჩა მხოლოდ ძველი დაფორები,
 მოსაგონებლად გულის მომწყლველი.
 რ. საჯავახოელი.

ივლისი 24.
 1908 წ.

**მაგალითები, რომლებიც ამტკიცებენ სულის
 უკვდავებას და საიქიო ცხოვრების არსე-
 ბობას.**

კაი ხანია ჩვენ შევწყვიტეთ ამ საგანზე
 ლაპარაკი მკითხველებთან. სულის უკვდავების
 და საიქიო ცხოვრების არსებობის საკითხი არ
 დაჰკარგავს თავის ინტერესს სანამ ადამიანი
 იცოცხლებს ქვეყანაზე. მატერიალისტი, რომ
 მატერიალისტია და არა სწამს არაფერი, გარ-
 და მატერიისა, იმასაც კი აღელვებს და აფი-
 ქრებს საკითხი: რანი ვართ და რა არის ჩვენი
 ცხოვრების მიზანი? მატერიალიზმი მხოლოდ
 ნიღაბია, რომელიც ჰფარავს ადამიანის შინა-
 გან განწყობილებას, ჩამოხსენით ეს ნიღაბი
 მატერიალისტს, ჩაიხედეთ მის გულში და
 თქვენ ცხადად დაინახავთ იქ იმ საკითხებს,
 რომელიც ყველა ჩვენგანს აღელვებს. აქე-
 დგან აიხსნება ის თანდისთან მოზარდი ინტე-
 რესი, რომლითაც მატერიალისტები ეკიდებიან
 შედარებით ახალ მეცნიერებას—სპირიტუალს.
 თუმცა იგინი ყოველივე სპირიტუალ მოვლენ-
 ნას თავისებურად, მატერიალისტურად ხსნიან
 (რომელიც ახსნაც, თავისთავად ცხადია არა-
 ფერს არ ამბობს და არაფერს არ ხსნის),
 მაგრამ ჯერჯერობით ისიც საკმარისია, რომ
 სპირიტუალ მოვლენას ისეთივე სინამდვილე
 აქვს მათ თვალში, როგორც ფიზიკურ საგ-
 ნებს. დაე ახსნან, როგორც უნდათ, ეს მოვ-
 ლენანი, ამით თვით მოვლენას არაფერი აკლ-
 დება ჩვენთვის არც ძალაში და არც დამარწმუ-
 ნებელობის ხარისხში.

გაძლიერებული ინტერესით უნდა აიხსნას
 უმთავრესად ის გარემოება, რომ სპირიტუალ
 მოვლენებს ადგილი ეძლევათ მატერიალისტურ
 ქუნალებში. მაგ. ბიტნერს თავის უკიდურეს
 მატერიალისტურ ჟურნალ „Вѣстникъ ана-“

შია*—ში მოუთავსებია უკანასკნელი გამოკვლევანი ინგლისის გამოჩენილ მსწავლულ სტედისა. ფრანგულ ჟურნალ „the Revue“-ს სიტყვით, ბიტნერი მოგვითხრობს სტედის გულწრფელობასა და კეთილ სინდისიერებაზე, რომელი თვისებებიც უეჭველყოფენ მის გამოკვლევებს სინამდვილის მხრივ. მას, ვინც სესილ როდსს უწოდა „კამპის ნაპოლეონი“ და მოითხოვდა მისი სასტიკად დასჯა, როგორც ძმათა მომსვრელ ბურებთან ამის მიზეზისა, მიუხედავად იმისა, რომ მან ამით დაჰკარგა ხუთი მილიონი, რომელიც მას რჩებოდა სესილ როდსის ანდერძისამებრ, თქმა არ უნდა, შანტაჟისტობას ვერ დავსწამებთ იმ კვლევადიებაში, რომელსაც იგი ამ უკანასკნელ დროს ეწევა იმ მიზნით, რომ გამოცდილებით დაამტკიცოს სულის არსებობა და მისი არსებობის განგრძობა შემდეგ იმ ცვლილებისა, რომელსაც საზოგადოდ სიკვდილს უწოდებენ, ხოლო ქართველებს კი სამართლიანად მიცვალება უქვიათ.

ბ. ბიტნერი ურჩევს მკითხველებს, რომ ბ. სტედის გადმონაცემი ფაქტები განიხილონ იმ დარბების მიხედვით, იმ მეთოდით, რომელიც მას მოყვანილი აქვს თავის წიგნ „Въ область таинственного“-ში. თითონ კი ვერ ბედავს (თუ განძრახ არაფერს ამბობს — არ ვიცით) ამ მხრივ მის შეხებას. მაგრამ ფაქტები თავისთავათ ლაპარაკობენ და მათი განმარტება მეტია, როგორც თვით მკითხველი დაინახავს. აი ეს ფაქტებიც ისე, როგორც მოყვანილია ბ. ბიტნერის ორგანოში *).

„ახლა მე გადავდივარ, ამბობს ბ. სტედი, იმ დამამტკიცებელ საბუთებზე, რომლებმაც დამარწმუნეს, რომ ადამიანის პიროვნება არ ისპობა, არამედ განაგრძობს არსებობას შემდეგ სიკვდილისა.

პირველად უნდა შევნიშნო, რომ მე ავტობიოგრაფიული წერის ნიჭი მაქვს. ეს ნიჭი მდგომარეობს შემდეგში: მოვიყვან რა ჰკუას უმოქმედო მდგომარეობაში, მე შემოძლია დავსდო კალამი ქაღალდზე, და ჩემი ხელი მწერს

მე წერილებს შორეულ მეგობართაგან. ამა-სთან სულ ერთია ცოცხალი არიან ეს ჩემი მეგობრები, თუ უკვე მიეცნენ იმ ცვლილებას, რომელსაც ჩვენ სიკვდილს ვეძახით.

როცა ასეთი ავტობიოგრაფიული წერილები მომიღის ჯერ ისევ ცოცხალ მეგობართაგან, მე შემოძლია შევამოწმო მათი სინამდვილე იმ პირების დაკითხვით, რომლებმაც იგინი გამომიგზავნეს. ყოველ გაუგებრობას რომ გადავრჩე, მე ყოველ შემთხვევაში უნდა დაუშატო, რომ ამ წერილების გადმოცემა უფრო ხშირად ხდება ხოლმე მათი ავტორის გაუგებრად, მათ ცნობის გარეშე. მოხდება ხოლმე, რომ რომლებიც მე მათ გაუგებრად ასეთ ბარათებს მწერენ ხოლმე, გაოცებული რჩებიან იმით, რომ ეს ხდება მათი ცნობიერების გარეშე. დასამტკიცებლად მე მოვიყვან გამოცდილებას, რომელიც მოვახდინე პირველ ჩემი გამოკვლევებისა.

ერთი ჩემი ნაცნობ მანდილოსანთაგანი, რომელიც სწერდა ჩემი ხელით უფრო უკეთ, ვიდრე თავის საკუთარით, კვირის უკანასკნელ დღეებს ატარებდა სოფელ გადისმერაში, რომელიც მდებარეობდა ლონდონიდან ორმოცდაათ კილომეტრზე დაშორებით. იგი ჩემთან უნდა ყოფილიყო ოთხშაბათს საუზმეზე, თუ ლონდონში დაბრუნდებოდა. ორშაბათს ნაშუადღევს მე მოვიწვიე გამეგო, დაბრუნდა თუ არა ჩემი ნაცნობი ქალი ქალაქში. ჩემმა ხელმა დასწერა შემდეგი:

ჩემთვის სასიამოვნო არ არის შეგატყობინო, რომ მე შემემთხვა სამწუხარო ამბავი, რომლის თქმაც თითქმის მრცხენია. მე გამოვედი გადისმერიდან ნაშვადღევს 2 ს. და 27 წ. მეორე კლასის ვაგონით, სადაც ჩემს გარდა იყვნენ კიდევ ორი ქალი და ერთი კაცი. გოდალმინში, სადაც პოეზი გაჩერდა, ქალები გადმოვიდნენ და მე მარტო დავჩვი ამ პოსაჟირთან. მან დასტოვა თავის ადგილი და მომიჯდა გვერდზე ძლიერ ახლოს. მე შემეშინდა და ვსთხოვე, ცოტა იქით გაეწია. მან უარი სთქვა და საკოცნელად მოიწია. მე ბრაზი მომერია. ჩვენ შორის გაიმართა პირობა. მე ვსტაცე ხელი მის ქოლგას და დაუწყე

* იხ. «Вѣсти. знанія» 1909 წ. №№ 8—9 33.

კემა, ქოლგა გადატყდა, და მე უკვე შეშინოდა, რომ ძალა არ დავრჩია; ამ დროს მატარებელმაც სვლას მოუკლო და გაგვაჩერა გილდფორდის სადგურზე. მამაკაცი შეფრთხა, გამიშვა ხელი და, სანამ მატარებელი გაჩერდებოდა, გამოვარდა ვაგონიდან და გაიქცა. მე ძალიან აღელვებული ვიყავი, მაგრამ ქოლგა მაინც შევინარჩუნე.

მე მივსწერე ჩემ კორესპონდენტ ქალს და გამოვუცხადე ჩემი მწუხარება ამ შემთხვევის გამო, და თან დავუმატე:

„დამშვიდდით და ოთხშაბათს ქოლგა თან წამოიღეთ“.

მან მიპასუხა:

„მე ძალიან ვწუხვარ, რომ თქვენ ყველაფერი იცით. მე გადავსწყვიტე არავისთვის არ გამემხილა ეს უსიამოვნო შემთხვევა. ქოლგა ჩემი იყო და არა იმ ვაჟბატონისა!!“.

ოთხშაბათს საუზმეზე ჩემმა ნაცნობმა ქალმა დამიმოწმა ყოველი წვლილმანი ამ შემთხვევისა და ქოლგაც მიჩვენა, რომელიც მართლა მას ეკუთვნოდა, და არა იმ კაცს. საიდგან შემოიპარა ესეთი შეცდომა წერილში? არ ვიცი. შეიძლება მიტომ, რომ მე არ გამომიკითხავს დაწვლილებით დანარჩენი ნაწილი მოთხოვს. ყველაფერი, რაც შემოძლია ვსთქვა მე ამ შემთხვევის შესახებ, ეს ისაა, რომ მე არ მქონია არავითარი ფიქრი არც მატარებელზე, რომლითაც ის ქალი გამოვიდა, არც იმ უსიამოვნებაზე, რომელიც მას შემემთხვა.

მე შემიძლია დავამოწმო, რომ მას შემდეგ—აგერ თუთხმეტი წლის განმავლობაში, მე ვღებულობ ჩემი მეგობრებისაგან ასეთ წერილებს. მოხდება ხოლმე შეცდომებიც, მაგრამ საზოგადოათ წერილები განირჩევიან გასაოცარი სინამდვილით (ТОЧНОСТЬЮ). ეს სისტემა ავტომატიურ ტელეპათიისა, რომლის მაწარმოებელნი არიან ადამიანები, ჯერ კიდევ ცოცხლები; ჩემ თვალში ისეთივე უცილობელი ფაქტია, როგორც ელექტრონის ტელეგრაფის არსებობა. ეს ისეთი ფაქტია, რომლის სინამდვილე ყოველ დღე შეიძლება გამოსცადოს კაცმა და რომლის ქეშმარიტება

ამიტომ ისეთივე უცილობელი საგანია ჩემი მეგობრებისთვის, როგორც ჩემთვის.

დავგრჩენია დავამტკიცოთ, რომ ასეთი სისტემა ავტომატიურ ტელეპათიისა, რომელიც უდრის უმავთულო ტელეგრაფს, შეგვიძლია განვავრცოთ იმათზედაც, რომლებმაც გასცურეს მდინარე სიკვდილისა. მე მოვიყვან ამის შესაფერ ფაქტებს ჩემ პირად გამოცდილებიდან.

მე ვიცნობდი ორ მანდილოსანს, რომელთაც მხურვალედ უყვარდათ ერთმანეთი. როგორც ხშირად მოხდება ხოლმე, იმათ ერთ-მანეთისთვის აღთქმა მიეცათ, რომ იგი, რომელიც უწინ მოკვდება, გამოეცხადება მეორეს, რომ ამით ცხადად დაუმტკიცოს მას სინამდვილე საიქიოს არსებობისა. ერთ ამ ქალთაგანს ერქვა იულია. ბევრი ხანი არ გასულა ამ პირობის დადების შემდეგ, რომ იგი გადაიცვალა ბოსტონში. გავიდა რამოდენიმე კვირა შემდეგ სიკვდილისა და იულიამ გამოაღვიძა თავის მეგობარი ქალი ჩიკაგოში და დასდგა მის თავით. გამოცხადებულის თვალეზი ბრწყინავდენ ბედნიერებით. შემდეგ რამოდენიმე წამის სიჩუმისა მოჩვენება ნელ-ნელა გადნა მსუბუქ ნისლად, რომელიც მთელი ნახევარი საათი იდგა ოთახში.

რამოდენიმე დღის შემდეგ, ნაცნობი, რომელზედაც მოგახსენებთ, მოვიდა ინგლისში. ჩვენ ვცხოვრებდით ერთად ესტნორ-კესლში, დასავლეთით, და იულია ხელშეორედ გამოცხადდა აქ. მის მეგობარ ქალს ჯერ კიდევ არ ეძინა, იგი ძალიან აღძრულ მდგომარეობაში იყო და ხედავდა იულიას ისე ცხადად, ისე გარკვეულად, როგორც სიკოცხლეში. მაგრამ ჩვენებას ლაპარაკი არ შეეძლო და ჩქარა გაქრა. იულიას მეგობარმა ვადმოძრა მე ეს მეორე ჩვენებაც და მკითხა, არ შეიძლება წირილი მივიღო მიცვალებულისაგან?

მე შევპირდი და მეორე დღეს ჩემმა ხელმა დასწერა ძალიან მოკლე, მართალია, მაგრამ, გარკვეული ბარათი:

„სთხოვე მაგას მოიგონოს, რა მითხრა მე, როცა ჩვენ უკანასკნელად ვნახეთ ერთმანეთი მინერასას“.

მე ვუბასუხე, რომ ეს წერილი უთავბოლოა, მაგრამ ჩემი ხელი ეინიანობდა და მიმტკიცებდა, რომ მეგობარი ქალი გაიგებდა. მე იმ ზომამდე დარწმუნებული ვიყავი ამ ბართის უთავბოლოებაში, რომ რამოდენიმე ხნის განმავლობაში არ მინდოდა განმეცხადებია იგი, მაგრამ, როცა იგი გადევნა, მან წამოიძახა. ნუთუ მართლა მან დასწერა ეს? ამ შემთხვევაში ეს ნამდვილად იუღიაა, აქ შეცდომა შეუძლებელია.

— როგორ შეგეძლოთ თქვენ, შევეკითხე მე, ყოფილიყავით მინერვასას?

ო!— ეს მართალია, მიიხრა მან, თქვენ არ იცით. სიკვდილის წინ იულიამ ქალბ. ვილარდს დაარქვა მინერვა და აჩუქა მას გულის ქინძისთავი, რომელზედაც გამოხატული იყო ბერძენთ ღმერთ-ქალი. მას აქეთ იგი იმას ყოველთვის მინერვას უწოდებდა და რაც მან დასწერა შენი ხელით ძირითადად შეესაბამება იმას, რაც მოხდა მაშინ, როცა მე და მინერვამ ვნახეთ იულია სასიკვდილზე სარეცელზე.

აქაც მსუბუქი შეცდომა შეიპარა. მინერვა იულიასთან იყო და არა იულია მინერვასთან, ხოლო დანარჩენში წერილი შესაბამია. მე მაშინ წინადადება მივეცი, რომ სხვა წერილებიც მიეღო. იულიას მეგობარი ქალი დაჯდა სტოლის ერთ თავში, ხოლო მე მეორეში, და როდესაც ჩემმა ხელმა დაწერა პასუხები აურაცხელ კითხვებზე, მე ვკითხე იულიას, ხომ არ ისარგებლებს იგი ჩემი ხელით თავის პიროვნების დისამტკიცებლად, ისარგებლოს ჩემი ხელით და მოაგონოს თავის ამხანაგს რომელიმე სრულიად ჩემთვის უცნობი შემთხვევა მათი საზოგადო ცხოვრებიდან. ითქვა—იქნა. ჩემმა ხელმა დასწერა:

— ჰკითხეთ, ახსოვს თუა არა მაგას, როგორ დაესერიანობდით ერთხელ ერთათ, ხოლო მაგ დაეცა და ხირხიმალი იტკინა.

— უკეთესი არ შეიძლება— შევნიშნე მე. მე არასოდეს არ მცოდნია, თუ ასეთი შემთხვევა გქონდათ თქვენ.

— მაგრამ, იულია, მე არასოდეს ასეთი შემთხვევა არ მქონია, მიუგო მეგობარმა.

მე გთხოვეთ თქვენ—წამოვიძახე გულმოსულად, მოგეგონებია შენ შეგობარ ქალისთვის ერთი ათას წვრილმან შემთხვევათაგანი, რომელიც მოგიხდათ ერთად ყოფნის დროს, თქვენ კი ისეთ რამეს სწერთ, რომელიც არასოდეს არ მომხდარა.

მაგრამ ჩემმა ხელმა შეურყეველად დასწერა:

— მე სრულიად მართალი ვარ, მაგას დავიწყნია.

— ასე თავის მართლება ადვილი შესაძლებელია მიუგე მე. შეგიძლიათ თუ არა უფრო დაწვრილებით მოაგონოთ ეს ამბავი?

— დიახაც—მიპასუხა მან.

— მე ველი პასუხს.—როდის იყო ეს?

— პასუხი: შვიდი წლის უკან!

— სად?

— სტრეტორაში, შტატ ილინოისში.

— როგორ მოხდა ეს?

— მე და მაგ ერთად დავბრუნდით შაბათს ლოცვიდან. თოვდა. ქალბატონი ბიულის სახლთან მაგას ფეხი დაუცდა ტროტუარის პირზე, დაეცა და ზურგი იტკინა.

მე ხმაშალა წავიკითხე დაწერილი. „ახ, აი რა უნდა სთქვას!—წამოიძახა იულიას მეგობარმა ქალმა—მე მშვენიერად მახსოვს. მე იძულებული გავხდი სამი-ოთხი დღე გამეტარებია ლოგინში. მე ზურგი მტკიოდა, მაგრამ არასოდეს არ მიფიქრნია თუ ხერხიმალი მქონდა გაფუჭებული.

მაგალითების გამრავლება მეტია. იმ დროს ჩვენსა და იულიას შორის დაწყებული დამოკიდებულება გაგრძელდა თუთხმეტი წლის განმავლობაში. მე ისეთივე სარწმუნოთ მიმჩნია იულიას მყოფობა საიქიოს, როგორც ჩემი ცოლის ან ჩემი დის მყოფობა ამ ქვეყნად.

სანმანიანი.

(შემდეგი იქნება).

კვირილამ კვირობამდე.

უ-დ სამღვდელთა გიორგიმ სამტრედიის სა-
ბლაღონინა ოლქი შემოიარა რევიზიით და 13-ს
ამა თვეს ქუთაისში დაბრუნდა.

ამერეთის წმ. გიორგის სარწმუნოებრივ გან-
მანათლებელ ძმობის წევრებად ჩაეწერენ და ხვედ-
რი საწევრო ფულად შემოიტანეს, მღვდ. გიორგი
ლიპარტყიანი და გულგეთელი (ფსევდონიმია).

როგორც ვაზ. „დროებს“ ატობიანებენ ქო-
ბულეთიდან, მდინარე ჭოროხის მახლობლად ამ
დღეებში სამსახლო და სხნავსათესი ადგილები
უნდა მიუზომონ ახლად გადმოსახლებულ რუსთა
ერთ ზარტას. ჩვენები კი გაიძახიან ქართველ
გლეხებს მიწა არა აქვსთა და უსევენ მათ შემამუ-
ლეებს!..

ქუთაისში წელის გამოყვანის საქმემ კიდევ
მოიძინა. არაფერი ბაიბური არ ისმის. საზოგადოე-
ბა მეტად შეწუხებულია ამ გარემოებით და სასო-
წარვეულილებას ეძლევა აწინდელი უზრავის შემ-
დგენელობის საქმიანობის უნარის შესახებ.

ამ დღეებში ქუთაისში მოქალაქე კავკასიის სა-
მსწავლო ოლქის მზრუნველს, რომელიც ექსკურ-
სიით მოდის. ექსკურსიაში მონაწილეობას დებუ-
ლობენ ტფილისის გიმნაზიის მოსწავლეები და მასწავ-
ლებლები რიცხვით 600 ვაზზე მეტი. ესეთი
ექსკურსია არა ჩვეულებრივია ჩვენში და უნდა ვი-
ფიქროთ მიზანიც არა ჩვეულებრივია ექნება.

საქმარქით სასწავლებლის მოწაფე ქალებმა და
მათმა მასწავლებლებმა მოიარეს ექსკურსიით ბათუ-
ში. უნდა ვიფიქროთ, არც ეს ექსკურსია ჩაივლიდა
უმნიშვნელოდ!...

რედაქციამ მიიღო ახალი წიგნი „სახელმძღვა-
ნელი ძველ და ახალ აღთქმის წიგნთა შესასწავ-
ლად“, შედგენილი ა. შ-ის მიერ. ეს სახელ-
მძღვანელო ზირველ ცნად უნდა ჩაითვალოს ქარ-
თულ ენაზე. წიგნი დაკვირვებითაა შედგენილი.

ერთ ნაკლად ამ წიგნისა უნდა ჩაითვალოს ის, რომ
ახალ აღთქმის ნაკლები ურადლებს აქვს მიქცეული,
ვიდრე ძველს. მაშინ როდესაც ზირველს 25 კვერდი
უკავია, მეორეს 136 კვ. უკავია. წიგნი შედარე-
ბით იაფია: ღირს ექვსი შაური. გამოწერა შეიძლე-
ბა. მწვემის რედაქციისაგან. ეს წიგნი ჩვენი შესე-
დულებით ძრაველ საჭიროა ახალ სამღვდელთა განდი-
დატოთების.

რედაქტორი, მღვდელი სიმონ მამელიძე.
გამომცემელი იოსებ ლეშავა.

გამოვიდა ახალი წიგნაკები

გამოცემა იმ. ენარქ. წმ. გიორგის სარწმუნოებრივ-
განმანათლებელ „ძმობისა“.

№ 1

სწამთ თუ არა მენსიერებს
ღვთის არსებობა?

№ 2

წიგნი წიგნთა.

(სვეტლოვიდან)
თარგმ. ნაცარყანელისა.
თითო წიგნაკის ფასი ერთი შაური.

ვაგზალებ სამღვდელთა სულიაგნთ საგნაგში,

ავრეთვე სამასწავლებლო
ეგზამენის ასალებად.

ადრესი: ქუთაისი, კახაკოვის ქუჩა, № 17.